

四庫全書

子部

欽定四庫全書

子部

御定孝經衍義卷六十一

二

詳校官中書_臣羅錦森

編修_臣倉聖脈覆勘

總校官檢討_臣何思鈞

校對官修撰_臣陳初哲

謄錄監生_臣劉復善

欽定四庫全書

御定孝經衍義卷六十一

天子之孝

教宮闈

漢成帝時許皇后與班婕妤

音接予婦官也

比皆有寵上嘗遊後

庭欲與婕妤同輦載婕妤辭曰觀古圖畫賢聖之君皆

有名臣在側三代末主乃有嬖妾今欲同輦得無近似

之乎上善其言而止太后聞之喜曰古有樊姬

楚共王夫人王

好獵姬數諫不聽乃不食禽獸肉二年王感之而勤政事今有班婕妤進侍者

李平得幸亦為婕妤賜姓曰衛其後上微行過陽阿主

家悅歌舞者趙飛燕召入宮大幸有女弟復召入姿性

尤醜粹左右見之皆嘖嘖音責齒作聲嗟賞有宣帝時披香

殿博士淖方成姓淖音泥淖之名方成其名在帝後唾曰此禍水也

滅火漢以火德王故云必矣姊弟俱為婕妤貴傾後宮許皇后

班婕妤皆失寵於是趙飛燕譖告許皇后班婕妤挾媚

道祝詛後宮詈及主上許后廢處昭臺宮考問班婕妤

倭伃對曰妾聞死生有命富貴在天修正尚未蒙福為
邪欲以何望使鬼神有知不受不臣之愬如其無知愬
之何益故不為也上善其對赦之賜黃金百斤趙姊弟
驕妬倭伃久見危乃求共居用反養弋向反太后於長信
宮上許焉

臣按漢高涸于祗席女禍及宗以是始終西京亡
于元后而成帝後宮尤甚班姬失寵則有秋風紈
扇之詞焉可以怨者矣辭輦之事從容有禮說者

猶自以為建始河平之際許班之貴傾動朝廷而況于趙家姊弟乎西漢之家法蓋不足觀也已

光武帝建武二年立貴人郭氏為皇后子彊為皇太子十七年廢皇后郭氏立貴人陰氏為皇后邳惲言於帝曰臣聞夫婦之好父不能得之於子況臣能得之於君乎是臣所不敢言雖然願陛下念其可否勿亂大倫使天下有議社稷者

十九年六月廢皇太子彊為東海王

臣按世祖中興大業宜思正己正人家齊國治之
義父父子子夫夫婦婦作則垂憲以貽後人今也
廢置皇后太子如奕棋然春秋之義固如是乎夫
以陰氏之始敷克讓而明帝之終篤友于知其未
必有媒孽之心讒慝之口色衰寵弛母愛子抱帝
實為之謂之何哉

周高祖詔後宮唯置妃二人世婦三人御妻三人此外
皆減之周主性節儉常服布袍寢布被後宮不過十餘

人

周天元將立五皇后以問小宗伯狄道辛彥之對曰皇后與天子敵體不宜有五太學博士西城何晏曰昔帝嘗四妃虞舜二妃先代之數何常之有帝大悅免彥之官詔曰坤儀比德土數惟五四太皇后外可增置天中太皇后一人於是以陳氏為天中太皇后尉遲妃為天左太皇后又造下帳五使五皇后各居其一

臣按人君立后體法乾坤象顯日月故后一而已

其餘則為夫人嬪婦女御未有與后並者也劉聰嘗立三后尋致敗亡高緯嘗立左右皇后亦就淪滅周主邕破齊之後頗知滿盈之戒毀其宮室之壯麗者省后宫妃嬪之數司馬光以為周高祖可謂善處勝矣它人勝則益奢高祖勝則益儉然則節儉之道宜子孫之所率由矣太子贊素多失德及即位即逞欲傳位太子驕侈彌甚自稱天元皇帝淫戲無常沉湎淫佚遂殞其身其立五后也雖

百彥之亦必不能止雖微安固將必遂者夫劉聰則稍遠耳高緯者固其父之所取其國而滅其族者也不法其父之後宮不過十餘人之家法而為三后二后之續乎高祖既能以節儉處勝不淫于色而不知其子之弗克負荷於嚴君之義有愧乎爾也

唐太宗即位放宮女三千餘人

尹起莘曰天子立后后固有六宮三夫人九嬪二十七

世婦八十一御妻矣然未聞千百其數也昔晉武平
吳之後掖庭殆將萬人遂殞其躬而亡其國今太宗
嗣位首放宮女三千餘人可謂盛德之事

立妃長孫氏為皇后后少好讀書造次必循禮法上為
秦王后奉事高祖承順妃嬪甚有內助及為后務崇節
儉服御取給而已上深重之嘗與之議賞罰后辭曰此
難之晨惟家之索安婦人安敢預聞政事固問之終不
對

元年三月皇后帥內外命婦親蠶

二年秋九月天少雨中書舍人李百藥言往年雖出宮人無用者尚多陰氣鬱積亦足致早上命簡出之前後三千餘人

六年三月以長樂公主

太宗之女

嫁長孫冲將出降敕有司

資送倍於永嘉長公主

高祖之女

魏徵諫曰昔漢明帝欲封

皇子曰我子豈得與先帝子比皆令半楚淮陽今奈何資送公主反倍于長主乎上入告皇后后歎曰妾數聞

陛下稱重魏徵不知其故今觀其引禮義以抑人主之私情乃知真社稷之臣也因請遣中使厚賜徵且語之曰聞公正直乃今見之願公常秉此心勿轉移也一日上朝罷怒曰會須殺此田舍翁后問為誰上曰魏徵每廷辱我后退具朝服曰妾聞主明臣直今魏徵直由陛下之明故也妾敢不賀上乃悅

八年冬十月聘鄭氏為充華既而罷之帝聘鄭仁基女為充華冊使將發魏徵聞其嘗許嫁士人陸爽遽上表

諫帝大驚自責命停冊使

十年六月皇后長孫氏崩后性仁孝儉素好讀書常與上從容商略古事因而獻替裨益弘多撫視庶孽逾於所生妃嬪已下無不愛戴訓諸子常以謙儉為先太子乳母以東宮器用少請奏益之后不許曰太子患德不立名不揚患無器用耶后得疾太子請奏赦罪人度人入道后曰死生有命非智力所移赦者國之大事不可數下道釋異端之教蠹國病民上素所不為奈何以吾

一婦人使上為所不為乎及病篤與上訣時房元齡以
譴歸第后曰元齡侍陛下久小心慎密苟無大故不可
棄也妾之本宗因緣葭莩以致祿位既非德舉易致顛
危欲保全之慎勿處之權要妾生無益於人願勿以丘
壟勞費天下但因山為墳器用瓦木可也更願陛下親
君子遠小人納忠諫屏讒慝省作役止遊畋則妾死不
恨矣后嘗采自古婦人得失事為女則三十卷又嘗著
論譏漢明帝明德馬后不能退抑親戚之權而徒戒其

車如流水馬如游龍

馬后不聽封爵
諸舅詔中語

是開其禍敗之原

而禁其末流也至是宮司奏之上覽之悲慟以示近臣

曰皇后此書足以垂範百世朕非不知天命而為無益

之悲但入宮不復聞規諫之言失一良佐故不能忘懷

耳乃召元齡使復其位冬十一月葬文德皇后帝為文

刻石稱皇后節儉遺言薄葬不藏金玉常使子孫奉以

為法帝念后不已於苑中作層觀以望昭陵常引魏徵

同登使視之徵熟視之曰臣昏眊不能見上指示之徵

曰臣以為陛下望獻陵若昭陵則臣固見之矣上泣為
毀觀

十一年三月以南平公主嫁王敬直敬直珪之子也先
是公主下嫁皆不以婦禮事舅姑珪曰主上欽明動循
禮法吾受公主謁見豈為身榮所以成國家之美耳乃
與其妻就席坐令公主執筭行盥饋之禮是後公主始
行婦禮

十三年二月詔內職有闕選良家有才行者充尚書奏

近臣掖庭之選或微賤之族禮訓蔑聞或刑戮之家憂
怨所積請自今後宮及東宮內職有闕皆選良家有才
行者以禮聘其沒官口賤人不得補用上從之

臣按帝王家法如易詩禮春秋所載記由之則得
不由之則失自三代以后之君莫盛於漢孝文帝
唐太宗文帝竇皇后雖不如文德皇后之以賢特
聞然其好黃老之言蓋亦有得於無為自化清淨
自正之意非有側媚之私嫉妬之心也司馬遷本

紀上常衣絺衣所幸慎夫人衣不得曳地幃帳不
得文繡以示敦朴為天下先則其不苟於色而宮
闈皆化之矣以唐太宗之賢而正位乎外以文德
后之賢而正位乎內歷覽前史幾于不可再得也
君子以反身之義推本言之有文王而後有以見
后妃之聖有太宗而後有以見文德后之賢太宗
即位之初即有放宮女之詔二年秋以久旱復減
省如前此豈非遠鑒晉武之禍近蓋厥考之愆耶

將聘充華而知其已字則立罷之依尚書奏不以
沒官口賤人補用內職資送長樂主初敕有司倍
於永嘉聞魏徵之諫而入告於后后稱徵引禮義
以抑人主之私情因而厚賜之其後南平公主出
降王珪之子敬直執禮於珪夫婦珪曰吾所以受
公主謁見者以主上欽明動循禮法故也凡太宗
宮幃之事其書於冊者大略如此而文德之賢為
開基聖母既葬昭陵太宗猶悲悼不已為層觀苑

中時登望之一聞魏徵獻陵之諷即為毀觀此又有發乎情止乎禮義之善焉夫後世言家法之不正以為莫盛於唐要之子孫之罪文德自賢后爾如太宗皇帝文德皇后合於家人之二五於夫婦之間宮闈之際度德比義則遠過乎漢孝文竇皇后矣

宋仁宗明道二年廢皇后郭氏時尚美人楊美人俱得幸數與皇后忿爭一日尚氏於帝前有侵后語后不勝

忿批其頰帝自起救之誤批帝頸帝大怒內侍闔文應因與帝謀廢后且勸以爪痕示執政帝以示呂夷簡告之故夷簡有憾於后遂主廢黜之議帝猶疑之夷簡曰光武漢之明主也郭后止以怨慙生廢况傷陛下頸乎帝意遂決夷簡先勅有司毋得受臺諫章奏乃詔稱皇后願入道封淨妃王京冲妙仙師居長寧宮臺諫章奏果不得入於是中丞孔道輔率諫官范仲淹孫祖德宋庠劉渙御史蔣堂郭勸楊偕馬絳段少連十人詣垂拱

殿伏奏皇后天下之母不當輕廢願賜對盡所言殿門
闔不為通道輔扣環大呼曰皇后被廢奈何不聽臺臣
言尋有詔令夷簡諭以皇后當廢狀道輔等至中書語
夷簡曰大臣之於帝后猶子事父母也父母不和可以
誅止奈何順父出母乎夷簡曰廢后有漢唐故事道輔
曰人臣當道君堯舜豈得引漢唐失德為法邪夷簡不
能答即奏言伏閣請對非太平美事遂黜道輔知秦州
仲淹知睦州祖德等罰金仍詔臺諫自今毋相率請對

臣按有宋世有賢后論者咸以杜太后治家嚴而有法太祖太宗事之甚孝謹以此故宮闈世無失德夾輔幼主中外肅然臣以為母儀則善矣而刑于之義尚似闕如是以不得而不論也夫宋之諸帝固莫有賢於仁宗者矣惜乎郭后之廢呂夷簡成之孔道輔范仲淹等爭之而不能得也其後哲宗之廢孟后賢妃劉氏構之章惇成之孟氏廢而劉氏立則雖欲如仁宗廢后而并斥美人不可得

也然而正家之義概乎未有聞也幸而世有賢后
耳不幸而有嫉妬驕恣如光宗之李后者則婦順
不章兩宮睽隔以萬乘之尊而受制一女子自宰
輔百官下至韋布之士以過宮為請者至於叩頭
引裾號泣而諫者相繼而不能得之於父子天性
之親此固家道之乖人倫之變為光宗者非無翻
然開悟之時而卒不勝其溺惑之私也善乎朱熹
之言曰三代之盛聖賢之君能修其政莫不本於

齊家蓋男正位乎外女正位乎內而夫婦之別嚴者家之齊也妻齊體於上妾承接於下而嫡庶之分定者家之齊也采有德戒聲色近嚴敬遠技能者家之齊也內言不出外言不入苞苴不達請謁不行者家之齊也然閨門之內恩常掩義是以英雄之才尚有困於酒色溺於情愛而不能自克者苟非正心修身動由禮義使之有以服吾之德而畏吾之威則亦何以正其宮壺杜其請託稔其姻戚

而防禍亂之萌哉書曰牝雞之晨惟家之索傳曰
福之興莫不本乎室家道之衰莫不始乎閭內此
熹之言匪直為一時而發凡有國有家者所當奉
為金鑑也

以上教宮闈

御定孝經衍義卷六十一

欽定四庫全書

御定孝經衍義卷六十二

天子之孝

論官材

臣按古之取人者以其所以教者取之而已其教國子教萬民皆以孝也於萬民曰孝行於國子曰孝德以有精粗之異焉夫其在鄉學之中族師黨正所得而書者必其有某事某事可稱舉也及其

升于太學則與世胄無異法矣故不獨紀其孝行而又教之以孝德則極之于視無形聽無聲跬步不忘之際內外本末交養成就然後升於司馬司馬又從而辯其才之所宜故六卿之屬罔非民譽六官之典無或廢替也興廉舉孝在漢猶爲近古然非有教成之才故無得人之盛後世設科待士日求之於語言文字之間雖屢更其法終無與行已居官之善敗者也雖欲去語言文字之科而復

於鄉舉里選之制亦未得爲大復古也其所以教者非古之法也經曰夫孝德之本也教之所由生也所以教之者在是所以取之在是也尚猶難且慎於官之爵之祿之敬之至也而後世乃欲以一日之文義偶當于理而輕以畀之乎雖復合之于鄉評清議其果公無私者乎此臣所以必欲窮其源也故官材之與學校相爲表裏始終皆以廣敬述論官材而銓選官制考課之法則繼事之當敬

者也故以類附焉履二蠱六幽貞高尚致之以禮其敢慢焉故又附以舉逸

禮記王制凡官民材必先論之論辯然後使之任事然後爵之位定然後祿之

命鄉論秀士升之司徒曰選士

司徒論選士之秀者而升之學

太學

曰俊士

升于司徒者不征

役

于鄉升于學者不征于司徒曰造

也成士

陳澹集說曰既升于司徒則免鄉之徭役而猶給役于司徒及升國學則并免司徒之役矣

大樂正論造士之秀者以告于王而升諸司馬曰進士孔穎達疏曰司馬掌爵祿但入仕者皆司馬主之司馬辯論官材論進士之賢者以告于王而定其論論定然後官之任官然後爵之位定然後祿之

孔穎達疏曰大樂正論造士之秀者以告于王王必以樂正所論之狀授之司馬司馬得此所論之狀乃

更論辯之觀其材能高下知其堪任何官是準擬其官以其材故云官材也司馬辯論之後不堪者屏退論量進士賢者以告于王而正定其論各署所長若長于禮者署擬于禮官長于樂者署擬于樂官既論定之然後試之以所能之官堪任此官然後爵命既受爵命使有職位然後與之以祿

臣按陳澠集說凡官民材者兼萬民而言之司馬辯論官材者論國中之士也古者鄉學教庶人國

學教國子及庶人之俊而其仕進有二道鄉學秀者之升曰選士國學秀者之升曰進士其選士者不過用為鄉遂之吏而選用之權在司徒也其進士則必命為朝廷之官而爵祿之其權在大司馬此鄉學國學教選之異所以為世家編戶之別然庶人仕進者亦是二道可為選士者司徒試用之此其一也司徒升之國學則論選之法與國子弟同矣此其二也故有選士之造者有俊士之造者

選士之造不征于鄉俊士之造不征于司徒優賢之典亦異也其前一條爲于萬民之士論其造者後一條于國中之士論其造者其司馬之所論定則又兼諸侯所貢于王之士而言

周禮夏官司馬司士以德詔爵以功詔祿以能詔事以久奠食

賈公彥釋曰云以德詔爵以功詔祿者據賢者試功之後其德堪用乃詔王授之以正爵有功乃詔王授

之以正祿也云以能詔事以久奠食者奠定也據能者先試之以事事成乃定以稍食其能堪用乃後亦詔授之以正爵祿稍食也者月給食不併給

臣按司馬辯論官材掌爵祿故有司士屬焉釋云正爵正祿者試以某官即支幾品俸即真之後位定祿自定矣非前此徒任之以事而不給以食也抑先王以司馬辯論官材而以司徒教習車甲則知所論非獨文所教非獨武也故其出也其比長

鄉大夫即為伍長軍帥其入也伍兩卒旅師軍還
為比閭族黨州鄉豈有文武可分為二途哉後世
乃謂儒者不知兵而更設武科以取士去古遠矣
周漢以降設科取士其目猥多各以其著者為類
究其終始以備觀覽焉

漢文帝十二年詔曰孝弟天下之大順也力田為生之
本也三老衆民之師也廉吏民之表也朕甚嘉此二三
大夫之行今萬家之縣云亡應令者豈實人情是吏舉

賢之道未備也

武帝元光元年冬初令郡國舉孝廉各一人初董仲舒對策曰臣愚以爲使諸列侯郡守二千石各擇其吏民之賢者歲貢各二人故州郡舉茂材孝廉皆自仲舒發之

元朔元年詔曰朕深詔執事興廉舉孝今或闕郡不薦一人是化不下究而積行之君子壅於上聞也

馬端臨曰詔旨皆以人才之遺佚咎在公卿之蔽賢

至立法以論其罪後來之法嚴繆舉之罰而限其塗
轍者有之矣未有嚴不舉之罰而責以薦揚者也蓋
古之稱賢能者皆不求聞達之士而後世之于薦舉
者皆巧于奔競之人故法之相反如此國家待士之
意固薄而士之不自重深可慨也

又曰漢時詔郡國舉薦人才賢良方正與孝廉二科
並行然賢良一科文帝與武帝時每對輒百餘人又
徵詣公車上書自鬻者以千數而孝廉之選武帝之

詔以爲閩郡不薦一人蓋賢良則稍有文墨材學者
可以充選而孝廉則非有實行可見者不容繆舉故
也

順帝陽嘉元年尚書令左雄議改察舉之法限年四十
以上儒者試經學文吏試章奏胡廣駁之詔從雄議

二年大史令張衡對策言自初舉孝廉迄今二百歲矣
皆先孝行行有餘力始學文法辛卯詔書以能章句奏
案爲限雖有至孝猶不應科此棄本而取末曾子長于

孝然實魯鈍文學不若游夏政事不若冉季今欲使一人兼之苟外有可觀內必有闕則違選舉孝廉之志矣漢安二年尚書令黃瓊以前左雄所上孝廉之選專用儒學文史於取士之義猶有所遺乃奏增孝弟及能從政者為四科

馬端臨曰按西漢舉賢良文學則令其對策而孝廉則無對策之事蓋所謂賢良文學者取其忠言嘉謨足以佐國崇論閎議足以康時故非試之以對策則

無以盡其材若孝廉則取其履行而非資其議論也
今亦從而有試焉則所謂孝廉者若何而著之于篇
乎又況左雄所言諸生試家法文吏課牋奏則又文
之靡者去賢良所對尚復遠甚而何以言孝廉乎雄
又言郡國孝廉古之貢士出則寧民宣協風教若其
面牆則無所施用愚以爲真實孝廉之人豈有不學
牆面之理而以家法牋奏應選者又豈可遽許以學
古入官之事也然史言雄立此法之後濟陰太守胡

廣等十餘人皆坐繆舉免黜唯汝南陳蕃潁川李膺
下邳陳球等三十餘人得拜郎中自是牧守畏慄莫敢
輕舉則知當時孝廉一科濫吹特甚於文墨小技尚
未能精通固無問其實行也科以孝廉名而猶如此
則其它可知王荊公石安言文章始隋唐進取歸一律
安知鴻都事竟用程人物漢靈帝時待制鴻都門下者本頗以經術相招後諸
為尺牘及工書鳥篆者嗚呼其來久矣非始于隋唐
皆加引召遂至數十人也

臣按先王論材之法卽教士之法以其所以教者
取之而已矣故司徒三物教萬民則曰孝友睦婣
任恤師氏三德三行教國子則曰孝德孝行大司
樂教樂德則曰中和祗庸孝友自始學以迄于大
成不離于是者也而其自鄉而司徒而樂正而司
馬德事言藝莫上于德可不謂之以其所以教者
取之也歟漢之舉孝猶為近古然而教法廢矣徒
曰以吾所取者在是是亦所以立教也云爾西都

之初賢良對策孝廉不試文藝賢良自炫鬻詣闕
下者以千數而孝廉應令者蓋寡亦可見重其選
難其人徵實行而不務浮華非後世設科取士之
意也不舉孝以不敬論不察廉免孝之與廉當是
各為一科也然當時所重者蔽賢之戮而卒乃反
之為坐濫舉之罪豈非世變使然乎東都則合為
一科而又試文如後世之科舉矣辛卯之詔蓋從
左雄之議也雄建言先試之于公府又覆之于端

門其于虛實之論似已審矣然其所試者何耶章句也奏案也抑何其高視章句奏案耶夫名曰舉孝廉而實以章句奏案為限雖有至孝猶不應科是所以教之之實于其所以取之之名又相違矣天下之士安得而不背本趨末哉雖然詔旨固為失之而張衡亦未為知言也彼章句奏案古之士自通小學者皆能之而司馬之為辯其論語于郊亦是考課其言也天下豈有不通小學之孝廉哉

晉元帝時以亂離之際欲慰悅人心州郡秀孝至者不試普皆署吏尚書陳顯言宜循舊制試以經策仍詔不中科者刺史大守免官於是秀孝皆不敢行其有到者亦皆托疾比三年無就試者諺曰舉秀才不知書察孝廉父別居彼舉者固不以實而應之者以奔競得之冀僥倖于不試而授官然後知古人之敷奏以言者亦所以防奸偽也則夫古之以德進者之非徒德也況乎章句奏案之至

淺鮮者乎僅能章句奏案而已尚未足以當事舉
言揚之選也況以德進者乎舉孝廉而不能通章
句不能為奏案不學牆面雖或至行可嘉而愚魯
至此亦不過賜以粟帛復之田畝豈可使之典城
牧民當日詔旨若云興廉舉孝非務浮華有德有
言辭達而已自今但以能章句奏案為限毋以論說
馳騁則得之矣

唐太宗貞觀十八年引汴廊諸州所舉孝廉賜坐于御

前上問以皇王政術及皇太子問以曾參說孝經並不
能答太宗謂曰昔楚莊王言事羣臣莫逮退而有憂色
朕發詔徵天下俊異纔以淺近問之咸不能答海內賢
哲將無其人耶朕甚憂之

宋太祖開寶九年詔翰林學士李昉等於禮部貢院同
閱諸道所解孝弟力田及有才武者凡七百四十人試
問所習之業皆無可採而濮州以孝弟薦名者三百七
十人上駭其頗多乃召問于講武殿率不如詔猶自陳

素習武事復試以騎射輒顛隕失次上顧曰止可隸兵籍皆呼號乞免乃悉令退去詔劾本部官司濫舉之罪

臣按馬端臨曰以孝廉或孝悌名科蓋取其平日之素履固難于一閱試之頃而知之也然自東漢以來孝廉遂為取士科目之通稱不復有循名責實之舉不過試以文墨小技而命之官至倥偬之際則并不試文而悉官之矣隋唐而後始有進士明經等科士之精華果銳者皆盡瘁于記問詞章

聲病帖括之中其不能以進士明經自進者皆椎
朴無文之人遂欲別求進身之塗輒故夤緣州郡
以應詔舉詳史所載二帝所以詢訪之者固非僻
書而已不能答則其無所抱負可知臣以是思先
王官材教士之法慮之至詳而求之至勤也孝弟
之道通于神明而其初不過洒掃應對之末節至
于詩書六藝之文不過以其餘力學之而已而古
人之文則非後世之文之所能及也豈非根本枝

葉之相反使然歟西漢之不使孝廉對策蓋有以也然自左雄建議儒通章句吏能奏案其事至淺而當時猶有罷黜者或者賢良一塗收其才俊而孝廉者皆推魯無文之人歟貞觀開寶之間乃欲拔雋異于不能應進士明經之餘輩宜其陋至于斯也

以上孝廉

漢文帝二年詔曰迺十一月朔日有食之二三執政舉

賢良方正能直言極諫者以正朕之不逮

臣按策賢良自此始矣晁錯傳言詔有司舉賢良文學士錯在選中對者百餘人惟錯為高第蓋錯未舉賢良時已為太子家令上書言事則賢良固以災異舉故以直言極諫為名而見任職官黃衣草澤並許應詔蓋亦非歲歲舉行也其後既為取士之一科而大中祥符間有言漢舉賢良多因兵荒災變詢訪時政闕失國家受瑞建封不當復設此

科斯真獻諛之臣矣

武帝初即位舉賢良文學之士前後百數而董仲舒以賢良對策天子覽其對而異焉乃復策之對畢復策之遂以爲江都相時四方士多上書言得失自銜鬻者以千數其不足采者輒報聞罷

臣按漢武帝策問董生殷勤反覆既而罷黜申韓蘓張之說及令郡國興廉舉孝皆行董生之言也蓋當時報罷者甚多而葉夢得乃謂對者皆預選

但有高下無黜落殆不其然也

昭帝始元六年詔有司問郡國所舉賢良文學民所疾苦議罷鹽鐵榷酤

馬端臨曰自孝文策晁錯之後賢良方正皆承親策上親覽而第其優劣至孝昭年幼未即政故無親策之事乃詔有司問以民所疾苦然所問者鹽鐵均輸榷酤皆當時大事令建議之臣與之反覆詰難講究卒從其說為之罷榷酤然則雖未嘗親奉大對而其

視上下姑相應以義理之浮文者反為勝之國家以科目取士士以科目進身者必如此然後為有益于人國耳

臣按賢良至于反覆詰難卒從其說可謂不負其其求之之詔而賢良亦不肯少移其說以阿執議之大臣可謂不負應詔之初心者也

晉武帝時阮种與邵詵王康對策俱居上第即除尚書郎然毀譽之徒或言對者夤緣假托帝乃更延郡士庭

以問之詔曰前者對策所問未盡子大夫所欲言故復延見其具陳所懷种策奏帝親覽焉又擢為第一轉中書郎

臣按漢之于董仲舒晉武帝之于阮种皆策之至于再三至如公孫弘在下第而擢居第一种居上第而仍擢第一蓋拔之疇人之中而褒然為首雖以空言取之而君臣契合以是為階非若後世付之有司而視以文具也唐憲宗元和三年策賢良牛

僧孺皇甫湜李宗閔等以直言忤權倖考官坐是
貶黜文宗太和二年劉蕡對策切直不避貴近考
官不敢以之上聞宰臣不敢為之明白馬端臨以
為由天子素無親覽之事故此輩得以刼制衡鑑
之人誠哉言也如二武之再三親策斯亦不失明
主勤于求賢之意矣宋世如富弼張方平蘇軾轍
兄弟皆可謂制科得人之盛而是科之罷且復者
不常而葉適著論以為制舉者所謂五十篇之文

泛指古今敷陳利害其言泛雜見者厭視聞者厭聽士之猥多無甚今世挾無以大相過之實而冒不可加之名朝廷所以汲汲而求之者乃為譏笑之具蘓軾亦自言所謂以口舌得官要而論之則因災變而訪求闕政民所疾苦未嘗預設是科也猶有無所負而自銜鬻者乃制科之弊則又不惟其能直言極諫切指時務而以發問題目出處顛倒句讀竄伏首尾傲天下以所不知而博習強記

者又先聚僻書揣摩綴拾其題目出處以便于淺學之士如是則雖天子親策之再三策之亦未見其必異才矣抑何其戾于古哉

以上賢良

隋煬帝始建進士科

臣按進士一科雖始于隋而其名則王制所謂大樂正論造士之秀者以告于王而升諸司馬曰進士者也唐因隋舊其科目繁多而秀才明經進士

三科為特著其後秀才一科既廢又復而士族所向惟明經進士兩科又其後則耻于為明經而榮于成進士蓋其名甚古其制則累代相沿損益可知于今為烈矣

唐武后天授元年二月策問貢士於洛陽城貢士殿試自此始

馬端臨曰殿前試士始于唐武后然唐制以考功郎中任取士之責后不過下行其事以取士譽非于考

功已試之後再試之也開元以後始以禮部侍郎知貢舉送中書門下詳覆然惟元和間錢徽知貢舉宰相段文昌言其取士不公覆試多不中選徽坐免官長慶以後則禮部所取士先詳覆而後放榜則雖有詳覆之名而實未曾再試矣五代以來所謂詳覆者間有升黜宋乾德六年命中書覆試則以疑陶穀之子不能文而中選故覆之亦未嘗別為之升黜至開寶六年李昉知舉放進士後下第人徐士廉等打鼓

論榜上遂于講武殿命題重試御試自此始然于昉等所取十一人內只黜武濟川一人餘十人則高下一依元次而續取到二十六人附名在後然則是年雖別試而共為一榜亦未嘗有省試殿試之分也至八年覆試禮部貢院合格舉人王式等于講武殿內出試題得進士三十六人而以王嗣宗為首王式者禮部所定合格第一人則居其四自是始有省試殿試之分省元狀元之別云

臣按武后之殿試乃後世之省試直于殿陛之間
行考功員外郎之事耳至開寶八年而省試殿試
始判為二名次升降不同遂有省元殿元之別然
而東漢左雄議改察舉之法所謂試之公府而覆
之端門者則固已有覆試之事矣惟殿庭與端門
差異自嘉祐二年以後方令禮部所奏進士俱免
黜落蓋天子臨軒策問第其甲乙而無所去取于
其間斯于延覽草茅之士委任鑑衡之臣兩得之

矣

肅宗乾元初中書舍人李揆兼禮部侍郎言主司取士多不考實徒峻其隄防索其書策深昧求賢之意及試進士文章曰于庭中設五經諸史及切韻本于牀而引貢士謂之曰大國選士但務得材經籍在茲請恣尋檢舒元輿舉進士見有司鈎校苛切既試尚書雖氷炭脂炬飧具皆人自將吏一唱名乃得入列棘園席坐廡下因上書言古貢士未有輕于此者且宰相公卿由此出

而有司以隸人待之羅棘遮絕疑其為奸又非所以求忠直也

洪邁曰唐穆宗長慶元年錢徽知舉放進士鄭朗等三十人後以段文昌言其不公詔中書舍人王起知制誥白居易重試白有奏狀論此事大略云伏料自欲重試進士以來論奏者甚衆蓋以禮部進士例許用書策兼得通宵得通宵則思慮必周用書策則文字不錯昨重試之日書策不容一字木燭只許兩條

金史卷六十二
趙促驚忙幸皆成就若比禮部所試事校不同乃知
唐試進士許挾書及給燭

臣按唐時科場條例如此五代以後雖有挾書之
禁而不搜索宋大中祥符五年以貢院監門官以
諸科舉人挾書為私悉解衣閱視失取士之體亟
令止之又試進士題目具經史所出摹印給示蓋
善屬文者檢閱不厭其詳苟不善文雖檢閱要為無
益惟明經則專取其記問通悉或以下文對或以

註疏對自不得不嚴其挾書之禁耳宋制御試不給燭亦以殿陛之間自有火禁景德三年乃詔進士就試不許繼燭也又唐人考校無糊名之法得以兼收譽望宋初淳化三年蘓易簡知舉殿試始令糊名考校自陳彭年晁迥更定條制封印卷首杜絕請託禮部糊名始於彭年其後遂置謄錄院闕防既密而史言其所實甲科多非人望然寸晷之文固不足以定生平之優劣而糊名之法苟以

絕奔競之風則可如曰其無情如造化至公如權衡不可易之制則夫子所謂舉爾所知人其舍諸者其義何居

代宗廣德元年禮部侍郎楊綰上疏以為古之選士必取行實近世專尚文辭自隋煬帝始制進士科猶試策而已至高宗時考功員外郎劉思立始奏進士加雜文明經加帖括從此積弊轉而成俗朝之公卿以此待士家之長老以此訓子其明經則誦帖括以求僥倖又舉

人皆令投牒自應如此欲其返淳朴崇廉讓何可得也
請令縣令察孝廉取行著鄉閭學知經術者薦之於州
刺史考試升之於省任各占一經朝廷擇儒學之士問
經義二十條對策三道上第即註官中第得出身下第
罷歸上命諸司通議給事中李栖筠左丞賈至京兆尹
嚴武並與綰同至議以為試學者以帖字為精通考文
者以聲病為是非風流頽敝誠當釐改然自東晉以來
人多僞寓士居鄉土百無一二請兼廣學校保桑梓者

鄉里舉焉在流寓者庠序推焉敕禮部具條目以聞綰
又請置五經秀才科秀才問經義二十條對策五道或
以為明經進士行之已久不可遽改事雖不行識者是
之

臣按楊綰之議不能行之於唐代宗之時而王安
石之議行之於宋神宗之世其所見則同也其後
文宗常患士不通經術李德裕請依綰議進士試
論議不試詩賦元翰林學士王惲亦嘗上奏成宗

謂宜行綰法令州郡察其孝友信行而通經學者州府試通所習經業貢於禮部問經義十條對時務策三道皆通為上第其經義通八策通二為中第其孝經論語孟子兼為一經夫識者既是綰而獨訾安石顧第弗深考也

宋太宗太平興國二年帝親試禮部舉人初太祖幸洛陽張齊賢以布衣獻策條陳十事四說稱旨齊賢堅執其餘策皆善太祖怒令武士拽出之及還語帝曰我幸

西都惟得一張齊賢我不欲爵之以官異時可使輔汝
為相也至是齊賢亦在選中有司失於掄擇寘於下第
帝不悅故一榜自呂蒙正以下盡賜進士及第又詔禮
部閱其十五舉以上及諸科一百八十四人並賜出身
召邢昺升殿講師比二卦又問以羣經發題帝嘉其精
博擢九經及第又九經七人不中格帝憐其老特賜同
三傳出身凡五百餘人皆賜綠袍鞞笏錫宴開寶寺自
為詩二章賜之謂侍臣曰朕欲博求俊彥於科場中非

敢望拔十得五止得一二亦可為致治之具矣

臣按太宗時惟太平興國二年淳化二年科目恩數最為優渥蓋太宗寤寐英賢如恐不及時出特恩以示獎勵故累科授官之崇卑分甲人數之多少初無一定之例臣觀太宗之言云欲博求俊彥於科場中非敢望拔十得五止得一二亦可為致治之具信斯言也豈獨區區偏私於齊賢一人哉

神宗熙寧四年更定科舉法從王安石議罷詩賦及明

經諸科專以經義論策試士時詔議科舉咸謂宜變法
便蘓軾獨上議曰得人之道在於知人知人之法在於責
實使君相有知人之明朝廷有責實之政則胥吏皂隸
未嘗無人雖因今之法臣以為有餘使君相不知人朝廷
不責實則公卿侍從尚患無人況學校貢舉乎雖復古
之制臣以為不足夫時有可否物有興廢使三代聖人
復生於今其選舉亦必有道何必由學乎且慶厯固嘗
立學矣天下以太平可待至于今惟空名僅存今陛下

必欲求德行道藝之士責九年大成之業則將變今之
禮易今之俗又當發民力以治宮室斂民財以養遊士
置學立師而又時簡不帥教者屏之遠方徒為紛紛其
與慶歷之際何異至于貢舉或曰鄉舉德行而略文章
或曰專取策論而罷詩賦或欲舉唐故事永譽望而罷
彌封或欲變經生帖墨而考大義此數者皆非也夫欲
興德行在于君人者脩身以格物審好惡以表俗若欲
設科立名以取之則是教天下相率而為偽也上以孝

取人則勇者割股怯者廬墓上以廉取人則敝車羸馬惡衣菲食凡可以中上意者無所不至自文章言之則策論為有用詩賦為無益自政事言之則詩賦論策均為無用然自祖宗以來莫之廢者以為設法取士不過如此也

王安石言于帝曰今人材乏少且其學術不一異論紛然不能一道德故也欲一道德則當修學校欲修學校則貢舉法不可不變若謂進士科詩賦亦多得人自緣

仕進別無他路其間不容無賢若謂科法已善則未也
今以少壯之士正當講求天下正理乃閉門學作詩賦
及其入官世事皆所未習此科法敗壞人材致不如古
既而中書門下又言古之取士皆本學校道德一于上
習俗成于下其人材皆足以有為于世今欲追復古制
則患于無漸宜先除去聲律偶對之文使學者得專意
經術以俟朝廷興建學校然後講求三代所以教育選
舉之法施之天下則庶幾可以復古矣于是改法罷詩

賦帖經墨義士各占治易詩書周禮禮記一經兼論語
孟子每試四場初本經次兼經大義凡十道次論一首
次策三道禮部試即增二道中書撰大義式頒行試義
者須通經有文采乃為中格不但如明經墨義麁解章
句而已其殿試則專以策限千字以上分五等第一等
二等賜進士及第第三等賜進士出身第四等賜同進
士出身第五等賜同學究出身

王安石以所訓釋詩書周禮三經上進帝謂之曰今談

經者人人殊何以一道德卿所著經其以頒行使學者
歸一遂頒于學宮號曰三經新義一時學者無不傳習
有司純用以取士安石又為字說二十四卷學者爭傳
習之自是先儒之傳註悉廢矣

臣按柳宗元送蔡秀才序言今世尚進士故天下
舉歸之而且更其科以為得異人乎無也惟其所
尚又舉而從之尚之以孝弟孝弟猶是人也尚之
以經術經術猶是人也姚康撰科第錄序言以孔

顏為心雖日視淫靡不能遷其操以桀跖為心雖
日聞仁義莫能治其性若膺鄉舉里選亦此流也
若搜茂材異行亦此流也則何必目秀才為樸名
進士為薄耶此二說與蘓軾之論皆可謂之辯矣
要之未為知本也鄉舉里選之制不行庠序學校
之教不立而欲致治于三代之盛未有能然者俱
為無益而其尤甚者非詞賦聲耦之文乎講先王
之遺文以致知格物舍經術其奚從乎善乎司馬

光之言曰取士之道當先德行後文學就文學言之經術又當先于詞章神宗專用經義論策取士此乃復先王之令典百王不易之法但安石不當以一家私學欲蓋先儒也自熙寧四年始罷詞賦專用經義取士凡十五年至元祐元年復詞賦與經義並行至紹聖元年復罷詞賦專用經義凡三十五年至建炎二年又兼用經賦蓋熙寧紹聖則專用經而廢賦元祐建炎則雖復賦而未嘗不兼經

而朱熹私議嘗欲罷詩賦而分諸經子史時務之
年使治經者必守家法答義者必通貫經文條舉
衆說而斷以己意有司命題必依章句以為如是
則士無不通之經史而皆可用于世蓋經賦之得
失得二臣之論而判然矣然其得人與否則又在
于主司之學行焉主司既賢且才而所取又賢且
才也淵源變化必有以成數十年之風氣而充于
庶職亦遂以共數十年之治功故國家之善敗未


始不由此也說者謂有司命題苟簡或執偏見臆
說互相背馳或發策用事訛舛故士子眩惑莫知
適從才者多致見遺所取之士既不精數年之後
復俾之主文柄是非顛倒逾甚時謂之謬種流傳
復容情任意不學之流往往中第而舉人之弊不
可勝言矣載攷明經一科熙寧四年始廢然自李
唐相沿重進士輕明經進士試時設香案禮拜供
帳甚盛明經試時設棘監守防閑甚密故時人有

焚香取進士嗔目待明經之語由進士者往往皆
至顯人由明經者往往不過學究之類則亦士之
不能為進士之文者為之耳故惟五代干戈搶攘
之際士失其業而明經乃多于進士也今之歲貢
號為明經則異是蓋其廩餼膠庠困頓場屋輪年
挨次使不致終于遐棄略如宋之十五舉以上並
賜本科出身抑又失厥初立法之本旨矣

初制必
取資性

純厚學業有成年二十方許及中
式者發國子監不中式者罰充吏

以上進士明經



御定孝經衍義卷六十二

欽定四庫全書

子部

御定孝經衍義卷六十三
四

詳校官中書_臣羅錦森

編修_臣倉聖脈覆勘

總校官檢討_臣何思鈞

校對官修撰_臣陳初哲

謄錄_臣監生劉復善

欽定四庫全書

御定孝經衍義卷六十三

天子之孝

論官材

銓選附

書皐陶謨皐陶曰亦行有九德亦言其人有德乃言曰
載采采禹曰何皐陶曰寬而栗柔而立愿而恭亂而
敬擾而毅直而溫簡而廉剛而塞彊而義彰也明厥有常

吉哉

孔穎達疏曰寬弘而能莊栗和柔而能立事愍愿而能恭恪治理而能謹敬和順而能果毅正直而能溫和簡大而有廉隅剛斷而能實塞彊勁而合道義人性不同有此九德

陸九淵曰皐陶論知人之道曰亦行有九德亦言其人有德乃言曰載采采乃是謂必先言其人之有是德然後乃言曰某人有某事蓋德則根乎其中達乎

其氣不可偽為若事則有才智之小人可偽為之故
行有九德必言其人有德乃言曰載采采然後人不
可得而廋也

匿也

臣按臯謨言彰厥有常吉哉立政言庶常吉士蓋
不持一二事之善可以偽為德而不常亦矯飾矣
故觀人者觀其常所謂不於其所勉而於其所忽
也周官言無載爾偽亦此義矣此非書之于比閭
族黨州鄉別之以秀選俊造進固不能一旦而得

其實也乃欲以頃刻周旋之地負其人倫之鑒哉
益稷數納以言明庶以功

陳大猷曰納言或以言揚明功或以事舉也

臣按舜典言數奏以言明試以功此文易奏為納
易試為庶者待諸侯與待黎獻之不同於諸侯驗
其已然之效于黎獻責其將然之效也自下而奏上
故言奏下陳而上納故言納諸侯以黜陟為重故
言試黎獻以多得為盛故言庶考績與求賢官人

之異也

周官推賢讓能庶官乃不和政寵

雜亂也

舉能其官惟

爾之能稱非其人惟爾不任

陳經曰人能推讓樂善故也不能推讓忌嫉故也九

官相讓衆賢和朝范宣子讓其下皆讓

晉悼公使之將中軍讓荀

偃其下韓起讓趙

武樂厲讓韓起

安有不和者我忌嫉人人必忌嫉

我交相忌嫉何有於和

董鼎曰因所舉之賢否益足以見我之賢否則推人

之賢乃我之賢也讓人之能乃我之能也

臣按此已是舉主連坐之條矣因所稱舉之賢否
益知其人之賢否適所以成推讓之風也古之人
觀人以常德則無矯飾于初變節於後之患而能
其官與非其人亦祇從所推讓之官而言謂某人
堪某官要當以考績為斷限非遷轉之後舉主始
終保任也虞廷九官皆讓而益稷言誰敢不讓蓋
讓則實讓非如後世之制授訖三日例舉一人自

代僅為虛文也然而夫子存羊愛禮則虛文未為
無庸時皆不讓習以成俗一人獨讓乃為立異使
賢明之士知讓賢為貴有欲讓之心而格於功令
之所不許為可惜也

論語無求備于一人

臣按先王教士所以責成之者甚備而升諸司馬
以後乃有德進事舉言揚曲藝之分蓋用人之長
而去其所短先王之忠厚也及其分職受任則有

終身於是官者觀帝舜即真之後禹宅百揆而仍行司空之事若近代之法則一人之身當遍歷九官而後宅揆矣惟舜則歷試以事如徽五典是掌教叙百揆是作相賓四門又兼四岳納大麓下攝山虞聖人功化神速一人而備衆人之能固不得懸以為常格也周典分六卿而各率其屬正所以無求備於一人也故當禽父

魯公

立國之初而告誡

之如此

孟子國君進賢如不得已將使卑踰尊疏踰戚可不慎與

朱熹集註曰如不得已言謹之至也蓋尊尊親親禮之常也然或尊者親者未必賢則必進疏遠之賢而用之是使卑者踰尊疏者踰戚非禮之常故不可不謹也

左右皆曰賢未可也諸大夫皆曰賢未可也國人皆曰賢然後察之見賢焉然後用之

輔廣曰所謂察之則必因言以察其心考迹以察其用如孔子之視所以觀所由察所安然後能親見其賢否之實從而用舍之則於賢者非徒知之知之必深而無所疑非徒任之任之必重而不可易至於不才亦不容以幸進矣

臣按漢武帝元封五年以名臣文武欲盡詔州郡察吏民有茂材異等可為將相及使絕國者先是汲黯常諫帝曰陛下求賢甚勞未盡其用輒已去

之臣恐天下賢才將盡陛下誰與為治乎至是而
黯之說驗也於是詔下而無有應者卒乃得霍光
金日磾以受遺蓋末年亦創若時而留意儲才矣
然所謂如不得已者非吝惜爵祿也參之以大公
而要之于獨斷知其賢斯任之勿貳矣若項籍之
印刳弊而不予與夫郭祚之為吏部尚書銓授稽
滯有此人便已貴矣之說是豈得言慎哉

漢元帝永光元年詔丞相御史舉質樸淳厚謙遜有行

者光祿歲以此科第郎從官

臣

按漢初惟有孝廉及賢良方正二科至是增質
樸淳厚謙遜有行為四也其初但已仕未仕皆得
舉而此則每歲以是考第郎從官之賢否蓋科目
之與銓選出於一途使仕於其入官之後而不變
其未達之所守其法之近古而甚善者乎詞章之
學蓋無所用于政事而舍詞章則又無以為進取
其為科舉之文則又詞章之卑近者士於既仕之

後不啻棄之如敝屣而後之所為政事者亦不過
簿書期會而已而區區以試士屬之禮部以選人
屬之吏部所取者未足為用而所以用之者非其
所以取之也法雖嚴令雖密果何益哉

魏文帝黃初元年立九品官人之法州郡皆置中正
陳羣以吏部不能審覈天下之士故令郡國各置中正
州置大中正皆取本土之人任朝廷官德充才盛者為
之使銓次等級以為九品有言行修著則升之道義虧

缺則降之吏部憑之以補百官行之浸久中正或非其人奸弊日滋晉尚書左僕射劉毅上疏曰今立中正定九品高下任意榮辱在手操人主之威福奪天朝之權勢公無考校之負私無告訐之忌用心百態營求萬端廉讓之風滅爭訟之俗成臣竊為聖朝恥之蓋中正之試于損政有八高下逐強弱是非隨興衰一人之身旬日異狀上品無寒門下品無勢族一也置州郡者本取州里清議咸所歸服將以鎮異同一言議也今重其任

而輕其人使駁違之論橫于州里嫌讐之隙結於大臣
二也本立格之體為九品者謂才德有優劣倫輩有首
尾也今乃使優劣易地首尾倒錯三也陛下賞善罰惡
無不裁之以法獨置中正委以一國之重曾無賞罰之
防又禁人不得訴訟使之縱橫任意無所顧憚諸受枉
者抱怨積直不獲上聞四也一國之士多者千數或流
徙異邦或給事殊方面猶不識況盡其才而中正知與
不知皆當品狀采譽于臺府納毀于流言任已則有不

識之弊聽受則有彼此之偏五也凡求人才欲以治民
今當官著効者或附卑品在官無績者更獲高叙是為
抑功實而隆空名長浮華而廢考績六也凡官不同事
人不同能今不狀其才之所宜而但第為九品以品取
人或非才能之所長以狀取人則為本品之所限徒結
白論而品狀相妨七也九品所下不彰其罪所上不列
其善各任愛憎以植其私天下之人焉得不懈德行而
銳人事八也由此論之職名中正實為奸府事名九品

而有八損古今之失莫大於此愚臣以為宜罷中正除九品棄魏氏之敝法更立一代之美制大尉汝南王亮司空衛瓘亦上疏曰魏氏承喪亂之後人士流移考詳無地故立九品之制粗具一時選用之本耳今者九域同規大化方始臣等以為宜皆蕩除末法咸用土斷自公卿以下以所居為正無復懸客遠屬異土盡除中正九品之制使舉善進才各由鄉論則華競自息各求於己矣武帝雖善其言而終不能改也

馬端臨曰九品中正之官設之于州縣是即鄉舉里選之遺意然未仕者居鄉有履行之善惡所謂品也既仕者居官有才能績效之優劣所謂狀也品則中正可得而定狀則非中正可得而知今欲為中正者以其才能之狀著於九品則宜其難憑要知既入仕之後朝廷自合別有考課之法而復以中正所定之品目第其升沈拘矣況中正所定者又未必允當乎

臣按州郡之立中正以本土之人而論本土人士

之優劣此與古之鄉舉里選不甚背馳也然而考之周官王制則古之法密而後之法疏古之法公而後之法私矣古者自五家為比以至于萬二千五百家為鄉命卿為鄉大夫鄉內之民有賢行者則行鄉飲酒之禮而賓興之中正之立蓋與鄉大夫相似然古之所以書其德行道藝者則自五家為比五比為閭四閭為族五族為黨五黨為州五州為鄉節次相承考較不異然後舉之非如中正

但一人之耳目一己之意見也又古者鄉所升之士則為凡民之雋異而教之大學之中未即官之也必自大樂正所論之秀升諸司馬而後司馬署其所長而使之試守一官其不堪者屏退至于入官之後所以黜陟之者又豈復委之於鄉大夫乎則夫未仕之前尚有成均之教既仕之後具存考績之格也若夫諸侯之國貢士之制則以所貢之賢否為慶讓而所建之侯亦中正之比也其為辨其

論官其材署其所長而屏退其不堪者亦必自于
司馬豈僅以一人之耳目一己之意見為升降哉
然而古之世胄皆入大學則又不由鄉大夫之所
升論也論者但以中正之黨勢族而抑寒門而欲
復古之鄉舉里選而不思夫鄉里之所選舉則與
勢族無異也或者以鄉里之選舉開寒畯之路而
以中正第門蔭之優劣則可以並行而不悖也官
狀之與鄉評固不可以合而為一要其入仕之後

亦有休假在籍之時而于其子姓僕隸又可以知其平日之能教約與否則銓選者之不但據官狀而又叅之以鄉評亦所以警官邪也又況前史所載如陳壽居喪使女奴丸藥積年沉廢郗詵篤孝以假葬違常降品一等謝惠連以居憂贈郡小吏詩坐廢閭閻孝謹為繼母所誣遂被清議十餘年則中正品目之嚴足以維持名教非淺鮮也

晉武帝以山濤為吏部尚書濤典選十餘年每一官缺

輒擇才資可為者啓擬數人得詔旨有所向然後顯奏
之帝之所用或非舉首衆情不察以濤輕重任意言之
于帝帝益親愛之濤甄拔人物各為題目而奏之時稱
山公啓事

臣按晉之山濤王戎並號有知人之鑒濤先後居
通塞之地十有餘年其啓事所處分者內則要地
外則方面可見當日銓選之權甚重非比後之居
是職者雖么麼小吏唯取年勞不簡賢否者也但

濤希帝意旨安得謂之有所權衡今觀其啓事中語如云不審宜爾有當聖旨者否不審有可叅舉者否待有所向然後顯奏則亦帝自用人與濤何與言乎稱職夫豈其然

宋孝武帝不欲權在臣下分吏部尚書置二人以都官尚書謝莊度支尚書顧覲之為之

裴子野曰官人之難尚矣居家視其孝友鄉黨察其誠信出入觀其志義憂難取其智謀煩之以事以求

其理臨之以利以察其廉周禮始于學校論之州里
告諸六事而後貢于王庭其在漢家州郡積其功能
五府舉為掾屬三公參其得失尚書奏之天子一人
之身所閱者衆故能官得其材鮮有敗事魏晉易是
所失弘多夫厚貌深衷險如谿壑擇言觀行猶懼弗
周況今萬品千羣俄析乎一面庶僚百位專斷于一
司於是囂風遂行不可抑止干進務得兼加諂賣無
復廉恥之風謹厚之操官邪國敗不可紀綱假使龍

作納言舜居南面而治致平章不可必也況後之官人者哉

臣按分曹為兩徒欲輕其權特不思夫其權愈輕而其流極則有勘簿呼名之弊反不如啓事之所甄拔矣夫以選曹之權重則於人有激揚進退可以責其知人官材之效也在人主則慎擇冢卿而已安在分其權乎

魏孝文帝與羣臣論選調曰近世高卑出身各有常分

此果何如李冲對曰未審上古以來張官列位為膏梁子弟乎為致治乎帝曰欲為治耳冲曰然則陛下何為專取門品不拔才能乎帝曰苟有過人之才不患不知然君子之門借使無當世之用要自德行純篤朕故用之冲曰傳說呂望豈可以門地得之帝曰非常之人曠世乃有一二耳祕書令李彪曰陛下若專取門地不審魯之三卿孰若四科著作佐郎韓顯宗曰陛下豈可以貴襲貴以賤襲賤帝曰必有高明卓然出類拔萃者朕

亦不拘此制。頃之劉昶入朝，帝謂昶曰：「或言唯能是寄，不必拘門。」朕以為不爾。何者？清濁同流，混齊一等。君子小人，名器無別。此殊為不可。我今八族當時貴族以上士人品第，有九九品之外。小人之官，復有七等。若有其人，可起家為三公。正恐賢才難得，不可止為一人。渾我典制也。

司馬光曰：選舉之法，先門地而後賢才。此魏晉之深弊，而歷代相因，莫之能改也。夫君子小人，不在于世。

祿與側微以今日視之愚智所同知也當是之時雖
魏孝文之賢猶不勉斯弊故夫明辨是非而不惑于
世俗者誠鮮矣

臣按古之貴遊子弟教之于國學所以簡稽之者
甚嚴則其成才者必多矣然而春秋譏世卿書言
世祿之家鮮克由禮何哉兩漢名臣由父兄任者
班班可考矣然而董仲舒之對策曰選多出乎郎
中中郎吏二千石子弟未必賢也王吉言舜湯不

用三公九卿之世而舉臯陶伊尹不仁者遠今使俗吏得任子弟率多驕驁不通古今至于積功治人亡益于民此伐檀所為作也則自漢之言任子不便者已然也至魏晉以後則九品所取大概以世家為主其間雖或辟召或舉孝廉而其人則必貴胄也至唐宋則門蔭入仕厥惟恩澤不由科目與辟召矣二三君子蓋嘗惡其濫而思革其弊卒亦未能盡去也通而論之唐宋之恩蔭不如魏晉

之門地魏晉之門地不如兩漢之任子何以言之
謂之曰任則其父兄有保任之責也昔祁奚舉午
奚之
子
內不避親在父兄有知子弟之明則任之可

矣劉向得淮南鴻寶書為黃金致其父得惡謚事
發相重孰肯任其不才子弟哉且漢之以父兄任
者為郎備宿衛執戟殿陛自其少時朝夕人主左
右與聞公卿議論中郎將以兵法部屬之而淳厚
有行者光祿勳歲課第之實本周官之遺意然則

世胄入官之途魏晉唐宋失之彌甚惟兩漢為近古歟

魏殿中尚書崔亮為吏部尚書亮奏為格制不問士之賢愚專以停解月日為斷沈滯者皆稱其能亮甥司空諮議劉景安與亮書曰殷周以鄉塾貢士兩漢由州郡薦才魏晉因循又置中正雖未盡美應什收六七而朝廷貢士止求其文不取其理察孝廉唯論章句不及治道立中正不考才行空辯氏姓取士之途不博沙汰之

理未精舅屬當銓衡宜改張易調如何反為停年格以
限之天下士子誰復脩勵名行哉亮復書曰汝所言乃
有深致吾昨為此格有由而然古今不同時宜須異昔
子產鑄刑書以救弊叔向譏之以正法何異汝以古禮
難權宜哉洛陽令代人薛琰上書言黎元之命繫于長
吏若以選曹唯取年勞不簡能否義均行雁次若貫魚
執簿呼名一吏足矣數人而用何謂銓衡書奏不報後
因請見復奏乞令王公貴臣薦賢以補郡縣詔公卿議

之事亦寢其後甄琛等繼亮為吏部尚書利其便已踵而行之魏之選舉失人自亮始也

東魏以高澄攝吏部尚書始改崔亮年勞之制銓擢賢能又沙汰尚書郎妙選人地以充之凡才名之士雖未薦擢皆引致門下與之遊宴講論賦詩士大夫以是稱之

臣按停年格始于武人入選之後武人入選始於羽林作亂之餘故答書有云今勲人甚多又羽林

入選武夫崛起而不解書計唯可曠弩前驅指蹤
捕噬而已忽令佩組乘軒求其烹鮮之效未常操
刀而使剗割又武人至多官員至少不可周溥設
令十人共一官猶無官可授況一人冀一官何由
不怨哉吾近面執不宜使武人入選請賜其爵厚
其祿既不見從是以權立此格限以停年耳然則
亮之為此蓋非得已要之行雁貫魚之誚則亦無
所解免者也及東魏元象中始革年勞之制而武

夫參選蠹政害人其弊未除自隋大業八年詔諸授勲官始不得授文官職事自唐以後則選有文武而吏部兵部分主之矣

唐高宗總章中定銓注法時承平既久選人益多司刑少常伯裴行儉始與員外郎張仁禕設長名姓歷榜引銓注之法又定州縣升降官資高下其後遂為永制無能革之者大畧唐之選法取人以身言書判計資量勞而擬官始集而試觀其書判已試而銓察其身言已銓

而注詢其便利已注而唱集衆告之然後類以為甲先

簡僕射乃上

進門下省

給事中讀

讀其身言書判利便也

侍郎

省

視也

侍中審之不當者駁下既審然後上聞

臣按身謂體貌豐偉言謂言辭辯正書謂楷法道

美判謂文理優長四者皆末也於德行才能何有

哉古之取人者未有以身書者也言非辭辯之謂

文非判語之謂惜乎簡之僕射上之門下給事中

讀侍郎省侍中審而僅區區四者之間而已也然

而猶有慎重周詳之意焉非徒計資量勞為也若後世則惟以資勞而已蓋每變而愈輕而于古之論官才之意愈遠矣

時魏元同為吏部侍郎上言銓選之弊以為人君之體當委任而責成功所委者當則所用者自精矣故周穆王命伯冏為大僕正曰慎簡乃僚是使羣司各求其小者而天子命其大者也乃至漢氏得人皆自州縣補署五府辟召然後升于天朝自魏晉以來始專委選部以

天下之大士人之衆而委之數人之手用刀筆以量才按簿書而察行借使平如權衡明如水鏡猶力有所極照有所窮況所委非人而有愚闇阿私之弊乎願畧依周漢之規以救魏晉之失疏奏不納

臣按當時之制尚書舉其大者侍郎銓其小者雖一命以上州郡無復辟署矣自隋以前六品以下官猶得長官自為辟召也史稱隋開皇中牛弘為吏部尚書選舉先德行而後文才務在審慎雖致停

緩其所進用並為稱職則選人之通塞猶係于銓
曹之藻鑑也裴行儉之法見謂慎詳而其所審駁
者身言書判非惟不先德行抑且無與文才自是
周漢之規遂不可復云

明皇以裴光庭兼吏部尚書先是選司注官惟視其人
之能否或不次超遷或老于下位有出身二十餘年不
得祿者又州縣亦無等級或自大入小或初近後遠皆
無定制光庭始奏用循資格各以罷官若干選而集

各以

謂下文官高者卑者也罷官謂罷劇就間者也若官高
千數未定之辭不拘多少爲一選聚集而銓注也

者選少卑者選多無問能否選滿卽注限年躡級毋得
踰越非負譴者皆有升無降其庸愚沈滯者皆喜謂之
聖書而才俊之士無不怨歎宋璟爭之不能得光庭又
令流外行署亦過門下省審

臣按停年格始于後魏本緣武人入選者多爲之
節級也至裴光庭則遂以此爲用人之法矣天下
固庸碌者衆而英特者少所以後世便之而莫之

能改也夫舉善以勸不仁自遠有知人之明而處
進賢退不肖之任安在其必循規矩蹈繩墨以求
寡過哉

後唐明宗天成二年制選人或因遠地干戈私門事故
遂至過格今後如過格十年外不在赴集之限又據長
定格選人中有隱憂者殿五選人倫之貴孝道為先既
有負于尊親定不公于州縣有傷風化須峻條章今後
諸色官員內有隱憂冒榮者勘責不虛終身不齒其入

仕告敕並付所司焚毀

臣按過格之令所以防偽濫又特為隱憂一項峻厥章固教孝之一端也

宋真宗景德元年詔內外羣官所保舉人亦有中道變遷但或不令言上必恐負累滋多宜令比類並許陳首當懲責其人特免連坐

四年又令舉官所舉差遣本人在所舉任內犯贓即用連坐之制其改他任犯贓元舉主更不連坐

哲宗元祐元年立十科舉士法舊制銓注有格槩拘以法法可以制平而不可以擇才故令内外官皆得薦舉其後被舉者既多除吏愈難神宗即位乃革去奏舉而槩以定格於是内外舉官法皆罷但令吏部審官院參議選格及帝即位左司諫王巖叟言其不便遂復内外舉官法司馬光奏曰為政得人則治然人之才或長於此而短於彼雖畢夔稷契各守一官中人安可求備故孔門以四科論士漢室以數路得人若指瑕掩善則朝

無可用之人苟隨器授任則世無可棄之士臣備位宰
相職當選官而識短見狹士有怙退淹滯或孤寒遺逸
豈能周知若專引知識則嫌於私若止循資序未必皆
才莫若使有位達官各舉所知然後克叶至公野無遺
賢矣欲乞朝廷設十科取士一曰行義純固可為師表
科有官無官人皆可舉二曰節操方正可備獻納科舉
有官人三曰智勇過人可備將帥科舉文武有官人四
曰公正聰明可備監司科舉知州以上資序五曰經術

精通可備講讀科有官無官人皆可舉六曰學問該博
可備顧問科同經術舉人七曰文章典麗可備著述科
同經術舉人八曰善聽獄訟盡公得實科舉有官人九
曰善治財賦公私俱便科舉有官人十曰練習法令能
斷請讞科舉有官人應職事官自尚書至給事中中書
舍人諫議大夫寄祿官自開府儀同三司至大中大夫
職自觀文殿大學士至待制每歲須於十科內舉三人
仍具狀保任中書置籍記之異時有事須材即執政按

籍視其所嘗被舉科格隨事試之有勞又著之籍內外
官闕取嘗試有效者隨科受職所賜告命仍具所舉官
姓名其人任官無狀坐以謬舉之罪所貴人人重慎所
舉得才

臣按熙寧中罷諸司之薦舉付銓選於吏部蓋欲
以示至公而絕倖門及元祐初司馬光秉政則又
請設十科舉士之法嚴謬舉之罪載攷蘇軾策別
有云天下之吏不可以人人而知也故使長吏舉

之又恐其舉之以私而不得其人也故使長吏任之他日有敗事則以連坐其過惡重者其罰均且夫人之難知堯舜病之矣今日為善而明日為惡猶不可保況於十數年之後其幼者已壯其壯者已老而猶執其一時之言使同被其罪不已過乎天下之人仕而未得志也莫不勉強為善以求舉惟其已改官而無憂是故蕩然無所不至今之世所以重發贓吏者何也夫吏之貪者其始必詐廉以

求舉舉者皆王公貴人其下者亦卿大夫之列以
身任之居官莫不愛其同類等夷之人故其樹根
牢固而不可動連坐者常為六七人甚者至十餘
人如盜賊質刼良民以求苟免耳為法之弊至於
如此蓋保舉一事二人之所見又不同如此要之
夫子告仲弓以舉爾所知譏臧文仲竊位而美公
叔文子同升則夫以人事君進賢受賞其來古矣
至於連坐之條固不可以不嚴而景德元年有並

許陳首之詔四年有改任犯賊舉主更不連坐之
詔又人才難以求備故司馬光分為十科隨器授
任其保狀則云臣切見其人有何行能臣今保舉
堪充某科如蒙朝廷擢用後不如所舉及犯入已
贓臣甘伏朝典不辭所謂不如所舉如舉行義純
固而違犯名教之類此亦不過指其一行之善苟
無所見何以為舉主於一行之善而不能保其將
來則不知夫何所見而舉之也坐之以罪宜矣其

犯賊一條如景德詔則亦只在所舉任內雖其人
中懷未能精白純一或亦勉而為廉以期不負所
舉然則蘇軾之論誠見于一偏也司馬光又言朝
廷執政只八九人若非舊交無以知其行能不惟
涉徇私之嫌兼所取至狹豈足以盡天下之賢才
若採訪毀譽則愛譽憎毀情偽萬端與其聽游談
之言曷若使之結罪保舉故臣奏設十科以舉士
其中一科公正聰明可備監司臣誠知請屬挾私

所不能無但有不如此所舉者嚴加譴責無所寬宥
則今後自然謹擇不敢妄舉矣詔皆從之

朱熹曰方今朝廷只消置一相三參政兼六曹樞密可
罷如此則事易達又如宰相擇長官長官却擇其寮今
銓曹注擬小官繁劇而又不能擇賢每道只令監司差
除亦好每道仍只用一監司

又曰朝廷只當擇監司太守自餘幕職縣官容他各辟
所知方可責成天下須是放開做使恢恢有餘地

臣按文獻通考徐氏曰公府之有辟命自西京則然東漢之世公卿尤以辟士相高卓茂習詩禮為通儒而辟丞相府史蔡邕少博學好詞章而辟司徒橋元府周舉博學洽聞為儒者宗而辟司徒李邵府又有五府俱辟如黃瓊者四府並命如陳紀者往往名公鉅卿以能致賢才為高而英才俊士以得所依乘為重是以譽望日隆名節日著而一洗末世苟合輕就之風馬端臨曰兩漢二千石長

吏皆可以自辟曹掾而所辟大槩多取所管屬賢士之有才能操守者蓋必如是乃能知閭里之奸邪黔庶之休戚故治狀之顯著常必由之後世長吏既不與之以用人之權而士自一命以上不使之效職顯能於本土士之賢者亦以隱情惜已不與郡府之事為高而與郡守縣令共治其民者則皆凶惡貪饕舞文悖理之胥吏大率皆本土人也竊以穆王命冏伯以慎簡乃僚與夫周禮之長官

辟除府史非必三代之兩漢亦行之矣何獨至
於唐已後而不可行乎惟其束縛於文法拘泥於
嫌疑而銓衡之地亦無所用其人倫之鑒其於分
職授政任功則苟以資格為次序而其人亦自詭
於必得而未見其有報稱知遇之心其為治如兩
漢之盛時亦已鮮矣安望其幾於三代哉

以上銓選

御定孝經衍義卷六十三

欽定四庫全書

御定孝經衍義卷六十四

天子之孝

論官材

考課附

書舜典敷

陳奏也

以言明試以功車服以庸

臣

按此舜攝位時巡狩述職慶讓諸侯之事蓋巡

狩之年諸侯各朝于方岳其間四年諸侯來朝于

京師敷奏以言是問其治狀明試以功是以其言而驗其狀之然與否也車服以庸蓋功成則賜車服以表顯之易晉卦康侯用錫馬蕃庶米菽詩路車乘馬元袞及黼皆為有功於民之諸侯而言其有功者以車服為榮則不蒙其賜者自足以為愧而言之不善則必有以告勅之此所以養諸侯而兵不試者也

帝曰咨汝二十有二人欽哉惟時亮天功三載考績三

考黜陟幽明庶績咸熙分北三苗

北音佩

孔穎達疏曰三年一閏天道成人亦可以成功故以三年考校其功之成否也九年三考則人之能否可知幽明有別黜退其幽者或奪其官爵或徙之遠方升進其明者或益其土地或進其爵位也分北三苗即是黜幽之事分北流之不令相從俱徙之則善從惡俱不徙則惡從善言善惡不使相從言黜陟善惡明也

陳大猷曰人情太寬則肆太嚴則拘故考績于三載時加警策以作其怠黜陟于九載期之久遠以要其成不拘不肆所以為善成

臣按此舜即真以後洛命羣臣史因述其考績黜陟之法而卒言其效然是法非自此始立也堯之試鯀亦以九載三考功用弗成而黜之至此更申飭之也三苗負固叛服不常攝位之時已竄其君於三危矣而舊都頑不即工伯禹徂征猶然逆命

振旅而還然後來格于是始考其善惡而分背之
然黜幽之典惟加于三苗而已此所以為庶績咸
熙而史臣繫此一句在庶績咸熙之下又因以見
有苗之格乃二十有二人之亮天工所致而非師
武之力也

禮記王制司會

冢宰之屬掌計要者

以歲之成

計要也

質

平也平其計要

于

天子冢宰齊戒受質

贊王受質

大樂正

宗伯之屬

大司寇市

司市也司

徒之屬

三官以其成從

從于司會

質于天子大司徒大司馬大

司空齊戒受質百官

此三官之屬

各以其成質于三官大司

徒大司馬大司空以百官之成質于天子百官齊戒受

質

受平報也

孔穎達疏曰司會總主羣臣治要故以歲治要之成質于天子質謂奏上文簿聽天子平量之冢宰是貳王治事故亦齊戒贊王受羣官所平之事共王論定也大樂正大司冠市三官各以其當司成要隨從司會平于天子以周法言之司會總主羣吏簿書則司

徒司馬司空簿書亦司會掌之下文司徒司馬司空
各質于天子不由司會惟大樂正大司寇市三官從
司會質于天子者司會總主治要先質于王樂正司
寇司市三官當司事少即徑從司會以質于王其司
徒司馬司空總主萬民其事既大雖司會進其治要
仍須各受質屬官親自質于天子天子平斷畢當須
報下故在下百官齊戒受天子所平之要又曰大樂
正大司寇及市亦當受屬官之質以其事少文不見

耳

臣按此一節先儒以為夏殷之制然周禮司會中大夫二人屬冢宰與此正同大樂正于周為大司樂市于周為司市當是稱名少異其實職守則同也周禮注歲計曰會月計曰要日計曰成夫以一日之計謂之成而夫子曰三年有成古人朝乾夕惕夙興夜寐謂生平之善敗得失在于須臾之頃所以必慎其獨也以一日之計而必要之三年者

官怠于宦成所以慎厥終如始者也一月之成即
一日之成一歲之成即一月之成三年之成其非
此一日之成乎此三載考績黜幽陟明之義所由
起也然而萬事之隳由元首叢脞所致必有兢兢
業業一日二日萬幾之心而後可以期庶績咸熙
之效至于受質之際君臣上下罔不齊戒以致其
敬此亦欽哉惟時亮天功之意也方慤曰必于歲
終乃齊戒以受之何哉蓋今歲于是乎終來歲于

是乎始朔易

冬月歲畢除舊更新

之事將有所平

均也

在

察始也

和之政將有所布宣既驗者可因為之監未然者可豫為之防君臣上下其可以不慎乎則齊戒以受之不為過矣又按陳澍集說云六官獨不言大宗伯者宗伯禮樂事行則天子六卿皆在無可歲會者惟大樂正教國子及一歲禮樂之費用當質之爾臣以為六官惟宗伯無懸象之事可見不從歲會周制亦然乃先王所以重禮樂也

周禮天官冢宰大宰之職歲終則令百官府各正其治受其會

賈公彥釋曰正其治謂正處其所治文書大宰乃受其計會也

聽其致事而詔王廢置

賈公彥釋曰百官致其治政功狀與冢宰聽斷其所置之功狀文書而詔告于王有功者置之進其爵有罪者廢之退其爵也

三歲則大計羣吏之治而誅賞之

賈公彥釋曰上計當年已有廢置今三年上大計大無功不徒廢更加罪大有功不徒置更加賞也

臣按陳大猷于舜典三載考績以為成周歲終受會詔廢置三歲大計行誅賞世變不同竊以虞廷亦必有歲會之廢置周官亦必有三考之黜陟蓋一歲之廢置者乃其不可一日立於民上者治狀卓異者及調簡調煩使人地相宜也三考之黜陟

者要其成于久寬其效於後者也夫無功大有功

乃更加誅賞耳虞周帝王之法豈以世變異同哉

小宰之職以聽

平治也

官府之六計弊

斷也

羣吏之治一曰

廉善二曰廉能三曰廉敬四曰廉正五曰廉法六曰廉

辨

臣按善能正敬法辨六者皆以廉為本鄭注云既

斷以六事又以廉為本賈疏云既以廉為本又計

其功過多少而聽斷之辭氣似有先後之不同要

之廉為六者之本故六計皆貫以廉濫濁不潔之人六者自不足觀如犯入已贓則更不必別論功過多少準除矣既廉矣然後聽斷其六事孟公綽優為趙魏老而不可以為滕薛大夫此即夫子所以聽斷公綽之法也賈疏迴易鄭句得之矣

漢元帝時京房言古帝王以功舉賢則萬化成瑞應著末世以毀譽取人故功業廢而致災異宜令百官各試其功災異可息詔使房作其事房奏考功課吏法上令

公卿朝臣會房會議溫室皆以房言煩碎令上下相伺
不可許上意向之時部刺史奏事京師上召見諸刺史
令房曉以課事刺史復以為不可行

臣按考課殿最乃漢見行之法房特為之煩瑣細
碎故公卿大臣及刺史皆以為不可行史亦不著

其得失若何大率舊制刺史以六條

一條彊宗豪右田宅踰制

以彊凌弱以衆暴寡二條二十石不奉詔書遵奉典制倍公向私旁詔守利侵漁百姓聚斂為奸三條二十石不郵疑獄風厲殺人怒則任刑喜則誣賞煩擾刻暴剝截黎元為百姓所疾山崩石裂譏

祥謫言四條二千石選署不平苟阿所愛蔽賢寵
顧五條二千石子弟恃怙榮勢請託所監六條二
千石違公下比阿附豪
強通行貨賂割損正令察二千石房必于六條之
內更分析多欸且又為功過相準之格此則受任
未幾負累山積矣安能久于其位至于三載三考
之從容者耶

魏明帝詔散騎常侍劉劭作考課法劭作都官考課法
七十二條詔下百官議司隸校尉崔林曰案周官考課
其文備矣自康王以下遂以陵夷此即考課之法存乎

其人也及漢之季其失豈在佐史之職不密哉且萬目

不張舉其綱

舉綱提綱

衆毛不整振其領

振表挈領

臯陶仕虞伊

尹臣殷不仁者遠若大臣能任其職式是百辟則孰敢

不肅烏在考課哉黃門侍郎杜恕曰明試以功三載考

績誠帝王之盛制也然歷六代而考績之法不著閱七

聖而課試之文不垂臣誠以為其法可粗依其詳難備

舉故也語曰世有亂人而無亂法若使法可專任則唐

虞可不須稷契之佐殷周無貴伊呂之輔矣司空掾傅

叅曰夫建官均職清理民物所以立本也循名責實糾勵成規所以治末也本綱未舉而造制末程國略不崇而考課是先懼不足以料賢愚之分精幽明之理也議久之不決事竟不行

司馬光曰為治之要莫先于用人而知人之道聖賢所難也是故求之于毀譽則愛憎競進而善惡渾淆考之于功狀則巧詐橫生而真偽相冒要之其本在于至公至明而已矣為人上者至公至明則羣下之

能否灼然形于目中無所復逃矣苟為不公不明則
考課之法適足為曲私欺罔之資也何以言之公明
者心也功狀者迹也已之心不能治而以考人之迹
不亦難乎為人上者誠能不以親疎貴賤異其心喜
怒好惡亂其志欲知治經之士則視其記覽博洽講
論精通斯為善治經矣欲知治獄之士則視其曲盡情
偽無所冤抑斯為善治獄矣欲知治財之士則視其
倉庫盈實百姓富給斯為善治財矣欲知治兵之士

則視其戰勝攻取敵人畏服斯為善治兵矣至于百
官莫不皆然雖詢謀于人而決之在己雖考求于迹
而察之在心研覈其實而斟酌其宜至精至微不可
以口述不可以書傳也安得豫為之法而悉委有司
哉或者親貴雖不能而任職疎賤雖賢才而見遺所
喜所好者敗官而不去所怒所惡者有功而不錄詢
謀于人則毀譽相半而不能決考求其迹則文具實
亡而不能察雖復為之善法繁其條目謹其簿書安

能得其真哉或曰人君之治大者天下小者一國內
外之官以千萬數考察黜陟安能不委有司而獨任
其事哉曰非謂其然也凡為人上者不特人君而已
太守居一郡之上刺史居一州之上九卿居屬官之
上三公居百執事之上皆用此道以考察黜陟在下
之人為人君者亦用此道以考察黜陟公卿太守奚
煩勞之有哉或曰考績之法唐虞所為京房劉劭述
而修之耳烏可廢哉曰唐虞之官其居位也久其受

任也專其立法也寬其責成也遠是故繇之治水九載績用弗成然後治其罪禹之治水九州攸同四隩既宅然後賞其功非若京房劉邵之法校其米鹽之課責其旦夕之效也事固有名同而實異者不可不察也考績非可行于唐虞而不可行于漢魏由京房劉劭不得其本而犇趨其末故也

晉武帝詔河南尹杜預為黜陟之課預奏古者黜陟擬議于心不泥于法末世不能紀遠而專求密微疑心而

信耳目疑耳目而信簡書簡書愈繁官方愈偽魏氏考課即京房之遺意其文可謂至密然失於苛細以違本體故歷代不能通也豈若申唐堯之舊制取大捨小去密就簡俾之易從也夫曲盡物理神而明之存乎其人去人而任法則以文傷理莫若委任達官各考所統歲第其人言其優劣如此六載主者總集採按其言六優者超擢六劣者廢免優多劣少者平叙劣多優少者左遷其間所對不鈞品有難易主者固當準量輕重微加

降殺不足曲以法盡也其有優劣徇情不叶公論者當委監司隨而彈之若令上下公相容過此為清議大類雖有課考之法亦無益也事竟不行

臣按劉劭之法即祖京房之遺意而司馬光所謂三公九卿刺史太守各考察其在下之人即杜元凱委任達官各考所統之說也其不欲豫為之法悉委有司亦猶元凱之言主者當準量輕重不足曲以法盡矣成周六計先漢六條簡易故可行也

唐虞之數奏明試必非預為煩文密法可知則安用此京劉之術為也

唐房元齡王珪掌內外官考考法凡百司之長歲校其屬功過差以九等內外之官叙以四善一曰德義有聞二曰清慎明著三曰公平可稱四曰恪勤匪懈善狀之外有二十七最一曰獻可替否拾遺補闕為近侍之最二曰銓衡人物擢盡才良為選司之最三曰揚清激濁褒貶必當為考校之最四曰禮制儀式動合經典為禮

官之最五曰音律克諧不失節奏為樂官之最六曰決
斷不滯與奪合理為判事之最七曰部統有方警守無
失為宿衛之最八曰兵士調習戎裝充備為督領之最
九曰推鞠得情處斷平允為法官之最十曰讐校精審
明于判定為校正之最十一曰承旨敕奏吐納明敏為
宣納之最十二曰訓導有方生徒充業為學官之最十
三曰賞罰嚴明攻戰必勝為軍將之最十四曰禮義興
行肅清所部為政教之最十五曰詳錄典正詞理兼舉

為文史之最十六曰訪察精審彈舉必當為糾正之最
十七曰明於勘覆稽失無隱為勾檢之最十八曰職事
修理供承彊濟為監察之最十九曰功課皆克丁匠無
怨為役使之最二十曰耕耨以時收穫成課為屯官之
最二十一曰謹于蓋藏明于出納為倉庫之最二十二
曰推步盈虛究理精密為厯官之最二十三曰占候醫
卜效驗多著為方術之最二十四曰檢察有方行旅無
壅為關津之最二十五曰市廛弗擾姦濫不行為市司

之最二十六曰收養肥殖蕃息滋多為牧官之最二十
七曰邊境清肅城隍修理為鎮防之最一最四善為上
上一最三善為上中一最二善為上下無最而有二善
為中上無最而有一善為中中職事粗理善最不聞為
中下愛憎任情處斷乖理為下上背公向私職事廢闕
為下中居官諂詐貪濁有狀為下下凡定考皆集于尚
書省唱第然後奏

臣按唐之書考先善狀而後課最而以一最四善

為上上諂詐貪濁為下下此與周官六計皆以廉
為本何異但所謂最者各以官之職守而言故一
人不得而兼二最也最有二十七正乃不求備于
一人其為疏節闊自異于漢京房魏劉劭遠矣此
元齡珪之所以輔太宗致貞觀之治之本也

宋仁宗慶歷八年詔近臣言時政翰林學士張方平言
祖宗之時文武官不立磨勘年歲不為升遷次序有才
用名實之人或從下位便見超擢無才用名實之人有

守一官十餘年不改轉者其任監當或知縣通判知州有至數任不得遷者故當時人皆自勉非有勞績知不得進自祥符之後朝廷之議益循寬大故令自監當入知縣知縣入通判通判入知州皆以兩任為限又守官及三年即例得磨勘先朝行之人始知恩未見有弊及今歲年深久習以為常皆謂本分合得無賢不肖莫知所勸願陛下稍革此制其應磨勘叙遷者必有勞績可褒或朝廷特敕擇官保任者即與遷轉如無勞績又不因

保任者更增展年考其保任之法不當一例應須選擇清望有才識之人即命舉之如此則是委執政之臣舉清望官委清望官舉親民官官有關員隨員數令舉又以見聖恩急才愛民之意也

臣按宋仁宗時更定磨勘法初太祖舊制文武常參官各以曹務閒劇為月限考滿即遷非循名責實之道乃罷之而置審官院考課中外職事受代京朝官引對磨勘非有勞績不得進秩其後立法

文臣五年武臣七年無贓私罪始得遷秩曾犯贓
罪則文臣七年武臣十年中書樞密取旨其七階
選人則考第資歷無過犯或有勞績者遞遷謂之
循資淳化四年始置磨勘司然每遇恩慶百僚多
得叙進真宗即位始罷之惟遇郊恩始加勛階爵
邑至是范仲淹富弼以官冗由磨勘亟易至高位
故獲蔭者衆奏定磨勘保任之法自朝官至郎中
少卿須清望官五人保任始得遷其後御史劉元

瑜以為適長奔競非所以養士庶恥乃罷之此慶
歷三年事也八年方平復應詔以為言要之磨勘
保任法行之不善亦長奔競行之而善適成治功
也舜命九官十二牧廷臣交推非以循資進秩也
而三年而考其功績三考而行其黜陟則知磨勘
之後仍須保任保任之後仍須磨勘也以此法施
之于京朝官誠宜矣何也方今令甲所以待外官
小吏者文網太密其遭罣誤而去者常不及待考

績之期其被叅罰且留者遂無由致俸滿之日蓋
錢糧盜逃之案一有差錯前功盡棄雖欲如京房
之法功過準除不可得矣豈不甚哉而京朝大官
乃無止限遷轉甚亟此臣所謂宜行保任之法也

洪邁曰國朝尚存唐制考課之法慶厯皇祐中黃亞夫
庶佐一府三州幕其集所載考詞十四篇黃司理者曰
治訐獄歲再周矣論其罪棄市者五十四流若徙者三
百十有四杖百八十六皆得其情無有冤隱不伸非才

也其孰能其考可書中舞陽尉者曰舞陽大約地廣他盜往往囊索於其間居一歲為竊與强者凡十一前件官捕得之其亡者一而已矣非才焉固不能可書中法曹劉昭遠者曰法者禮之防也其用之以當人情為得刻者為之則拘而少恩前件官以通經舉進士始掾于此若老于為法者每抱獄具必傳之經義然後處故無一不當其情其考可書中他皆類此不知其制廢于何時今但付之主案吏据定式書于紙尾比者又令郡守

定縣令臧否高下人亦不知所從出若使稍復舊貫似為得宜雖未必人人盡皆公實然思過半矣

臣按宋慶厯皇祐中考詞如此純雅可為法則其于虛實之論固已核矣要非文無害吏所能為也當洪邁時此制廢已久迄今數百餘年皆踵據定式書紙尾之陋斯則舊貫可復奚必當今之是乎

以上考課

御定孝經衍義卷六十四